

Ár 2021, þriðjudaginn 10. ágúst er fundur haldinn í aga- og úrskurðarnefnd KSÍ á skrifstofu Knattspyrnusambands Íslands í Laugardal, Reykjavík, af nefndarmönnum Gunnari Guðmundssyni, Helga R. Magnússyni og Þresti Ríkharðssyni.

Fyrir er tekið málið nr. 12/2021:

Framkvæmdastjóri KSÍ
gegn
Knattspyrnudeild Þórs

Gögn málsins liggja frammi. Er nú í nefndinni kveðinn upp svofelldur

ÚRSKURÐUR:

I.

Aðilar máls:

Kærandi:
Framkvæmdastjóri KSÍ
Klara Bjartmarz

Kærði:
Knattspyrnudeild Þórs
Fyrirsvarsmaður: Gestur Örn Arason

II.

Málsatvik:

Á fundi aga- og úrskurðarnefndar KSÍ 10. ágúst 2021 var tekin fyrir greinargerð sem framkvæmdastjóri KSÍ sendi til nefndarinnar sama dag., skv. 20. gr. í reglugerð KSÍ um aga- og úrskurðarmál. Fram kemur í greinargerð framkvæmdastjóra að málið varði ósæmileg opinber ummæli Orra Freys Hjaltalín, þjálfara Þórs í mfl. karla., í viðtali sem birtist á vefmiðlunum fótbolti.net, þann 27. júlí 2021. Var um að ræða opinber ummæli sem eru að mati framkvæmdastjóra til þess fallin að skaða ímynd íslenskrar knattspyrnu og með þeim hafi verið alvarlega vegið að heiðarleika dómara í leik Þórs og Fram í Lengjudeild karla, þann 27. júlí sl.

Ummæli sem vitnað er til í greinargerð framkvæmdastjóra eru eftirfarandi:

„Vonandi fáum við bara einhverja almennilega sendingu næst, svo vil ég líka taka það fram að það er gjörsamlega galið að vera með aðstoðardómara hérna frá hinu liðinu á Akureyri þetta myndi aldrei nokkur tíman vera tekið í mál í Reykjavík, KSÍ á alveg nógu mikla peninga til að geta fengið einhvern hlutlausann í að koma hérna og dæmt þessa leiki. Ég er nú búinn að horfa á hans frammistöðu hjá okkur núna í síðustu leikjum þegar hann hefur komið hérna í sumar og hún hefur ekki verið okkur í hag ef við orðum það svona pent.“

Í samræmi við grein 20.2. í reglugerð KSÍ um aga- og úrskurðarmál ber að fara með mál, sem framkvæmdastjóri vísar til nefndarinnar á grundvelli 20. greinar, eins og um kærsmål sé að ræða. Greinargerðin framkvæmdastjóra var því send til knattspyrnudeildar Þórs og félaginu gefinn kostur á að koma sjónarmiðum sínum í málinu á framfæri við nefndina fyrir kl. 17:00 föstudaginn 6. ágúst 2021.

Á fundi nefndarinnar 10. ágúst 2021 lá fyrir greinargerð sem barst nefndinni þann 6. ágúst sl. frá Gesti Erni Arasyni formanni knattspyrnudeildar Þór. Í greinargerðinni kemur fram að stjórn knattspyrnudeildar Þórs Akureyri og þjálfarar meistaraflokks harmi framangreind ummæli og mun félagið leggja áherslu á að stýra umræðunni í aðra átt en að dómurum í framtíðinni.

III.

Niðurstaða:

Fyrir liggur að taka þarf afstöðu til þess hvort framkoma þjálfara mfl. karla hjá Þór, Orra Freys Hjaltalín, sem vitnað er til í greinargerð frá framkvæmdastjóra KSÍ, dags. 29. júlí sl., falli undir ákvæði 20. gr. reglugerðar KSÍ um aga- og úrskurðarmál. Ákvæðið er svohljóðandi:

„Framkvæmdastjóra KSÍ er heimilt að vísa til aga- og úrskurðarnefndar atvikum sem skaðað geta ímynd knattspyrnunnar eða þeirra sem þátt taka í leiknum. Slík atvik hafa þá ekki komið fram í atvikaskýrslum dómara og/eða eftirlitsmanns á leiknum en geta verið hvers kyns ósæmileg framkoma á leikstað eða á annan hátt opinberlega.“

Með vísan til greinar 1.4. í reglugerð KSÍ um knattspyrnumót skulu félög, iðkendur, forystumenn og aðrir jafnan sýna drengskap og forðast hvaðeina sem rýrt gæti álit almennings á íþróttinni og koma fram af hollustu, heiðarleika og sönnum íþróttanda. Þeir sem taka þátt í starfi knattspyrnuhreyfingarinnar skulu leitast við að gera ekkert það sem til vanvirðu má telja fyrir íþróttina.

Að því virtu og öðrum fyrirbyggjandi gögnum er það álit aga- og úrskurðarnefndar KSÍ að tilvitnuð opinber ummæli Orra Freys Hjaltalín hafi verið ósæmileg og hafi skaðað ímynd íslenskrar knattspyrnu. Samkvæmt þessu falla ummæli Orra undir ákvæði 20. gr. reglugerðar KSÍ um aga- og úrskurðarmál. Í samræmi við reglugerð KSÍ um aga- og úrskurðarmál, grein 12.9.e), hefur brot á 20. grein í för með sér sekt að fjárhæð kr. 200.000,- en þó ekki lægri en kr. 50.000,- og/eða leikbann í tiltekinn fjölda leikja eða tímabundið.

Ákvað aga- og úrskurðarnefnd KSÍ á fundi sínum 10. ágúst 2021 að sekta knattspyrnudeild Þórs, um kr. 50.000,- vegna framangreindra opinberra ummæla Orra Freys.

IV.

Úrskurðarorð:

Knattspyrnudeild Þórs skal sæta sekt að upphæð kr. 50.000,- til KSÍ

Um áfrýjun:

Samkvæmt grein 16.3 í reglugerð KSÍ um aga- og úrskurðarmál er frestur til að áfrýja máli til áfrýjunardómstóls KSÍ 3 dagar frá því að úrskurður aga- og úrskurðarnefndar er kveðinn upp og skulu almennir frídagar ekki taldir með.

Gunnar Guðmundsson [sign]

Helgi R. Magnússon [sign]

Þróstur Ríkharðsson [sign]